

اش قضى ليا هاد الشي ؟

كاينصحونا بالمطالعة، المطالعة، القراية د الكتب
كايفورو لينا الفضاء و الكامبيتر و المنسقين باش نقراو
بغاونا نكونو بحال الكور، ديما كايقراو
الله يجازيهم بخير
ولكن أنا ديما عندي نفس السؤال
أش غايقضي ليا هاد الشي ؟
تايقلو الثقافة هي كلشي
أنا بعدا ما شفت والو

أنا محتاج الفلوس باش نقضي الأغراض ديالي
أنا محتاج الخدمة باش ما نبقاش ديما نطلب للوالدة
أنا خاصني الإمكانيات باش نتزوج و ندير داري
احسن ليا يفرقو علينا داك الفلوس نتنفعو بيهم

أنا قرئت وعندي الباك و الليسانس، كملت المرحلة بالقراية
صاحبي عندي الشواهد ديال التكوين المهني و مشومر
ضيعنا وقتنا و خسرنا فلوس بلا نتيجة
الوالد ديالي ما عمرو قرا و راه خدام وعائش بخير
كانعرف شحال من واحد ما عمرو قرا و داير لا باس
الناس مضبرين على راسهم ما كايعرفو حتى شنا هو الكتاب

أش غاتقضي ليا القراية ؟
اللي قلت ليه أنا باغي نعطيها للمطالعة كايضحك عليا
انت باغي تدير فيها المثقف ؟
عندهم الحق
درت المجهود و قرئت مع المجموعة ولكن ما شفت حتى نتيجة
الوالدين ما تاي فهموش علاش ديما كانطلب ليهم فلوس و ما زال ما ضبرت على خدمة
ما كانعرف باش نجاوبهموم

قالو لينا واحد فالشمال كان فقير ما كايعرف لا يقرا لا يكتب و اصبح كاتب معروف فالعالم
حيث دار المجهود و تعلم بوجدو
أنا ما عنديش الوقت باش ندير المجهود، ما عنديش الكانة
أنا ما عنديش مع الكتاب، كانبدا نقرا كا يجينيبي النعاس
إلا قرئت احسن ليا نقرا القرآن، ندير بعدا شي بلاصة فالجنة

ملي كانضبر على شي بركة كانشارجي التلفون و كاندخل للفايس نتفرج
كانشوف الناس كيف عايشين و كاننسى المشاكل
كانتفرج و نفوج على قلبي
واحد النهار دوّرت النهار كلو فالفايس
حتى جرات عليا الواليدة: نوض المسخوط قلب على خدمة

وفين هي الخدمة ؟
باش تلقى خدمة خصك التدويرة و المعارف. منين نجيبهم ؟
الفايس عامر بالناس اللي حركوا
كاتشوفهم ناشطين مع راسهم، شبعانين فلوس
واحد فيهم مصور كيفاش حتى حرك

مغامرة ! عجبني ! دوّز خميس سوايع فتّمارة و فلت
ملي وصلو جابو ليهم الكاشات و الماكلة

خمسة دالمليون و ها نتا بخير مع راسك
الوالدين غاينشطو حتى هما حيت غانشبعهم فلوس
نمشي تماك ، نصبر عام عامين ، ندير الوراق و نرجع نتبوردهنا

كايعاود ليا واحد صاحبي الخدامي موجودة، و ما كاين اللي بيرزطك
اللغة گاع ما مطلوبة، دير خدمتك و هانت بخير
ويلا احتجت اللغة هما يخلصو عليك
ايلا مرضت هما يجيبو ليك الطبيب
بيننا و بينهم البحر و الموج، أنا ما تاخلعونيش

دوزت مدة معاهم فالمرکز، ما بان ليا والو
باركين علينا بالقيم و المباديء
أنا ما فهمتش كيفاش أنا نطبق القيم و المباديء والشفارة شبعانين فلوس
تمشي للإدارة تشد الصف و الآخر يدوز من اللور و يقضي الغرض

گالو لينا ضروري تتعلمو اللغة الفرنسية
ملي كاتمشي تقضي شي غرض محتاج فيه الفرنسية
تلقى هداك المسؤول براسو ما فاهمش الفرنسية
واش غير انا اللي مكلخ ؟

دوّرنا السوايع فاللغة و ما تعلمنا والو
المعلم براسو ما فاهم حتى زفتة
واش خصنا نعاودو من الزيرو ؟
أنا كافيني هاد الشئ اللي كانعرف
كانقرا و نكتب فالفايس و الواطصاب مع اصحابي
كانفهمهم و كايهموني
إيلا احتجت شي حاجة فيها اللغة كانضبر و كانسلك راسي
علاش ما يدبروش لينا كلشي باللغة اللي كانتفاهمو بيها بيناتنا ؟

اش قضى ليا نقرا و نكتب ؟
أنا باغي الخدمة و الفلوس...